

Ilaqutariinnermut Peqqissutsimullu Naalakkersuisoq

Landsstyremedlem for Familie og Sundhed



Demokraatit

Att.: Inatsisartuni ilaasortaq Jørgen-Ole Nyboe Nielsen

Inatsisartut suleriaasianni § 36, imm. 1 naapertorlugu suliaritinniarlutik utaqqisut allattorsimaffii assigiinngitsut kiisalu napparsimaleratarsinnaanermut sillimasiineq pillugit apeqqutit pillugit.

Ulloq/Dato: 1.12.2008
J.nr.

Asasara Jørgen-Ole Nyboe Nielsen

Naalakkersuisut sinnerlugit matumuuna suliaritinniarlutik utaqqisut allattorsimaffii assigiinngitsut kiisalu napparsimaleratarsinnaanermut sillimasiineq pillugit apeqquteqaatitit akissuteqarfigissavakka.

Postboks 260
3900 Nuuk
Oq/tel +299 34 50 00
Fax +299 32 45 47
ilapi@gh.gl
www.nanoq.gl/ilapi

Suliaritinniarlutik utaqqisut allattorsimaffii

Seeqquluuteqarneq peqqutigalugu seeqqusalertinniartut maannakkut ukiut pingasut sisamallu akornanni utaqqisarput. Taamaattorli suliaritittussat marluk 2002-mili utaqqilerput. November 2008-mi utaqqisut 201-iupput. Napparsimaveqarfimmut aningaasaliissutit maannakkut atuuttut naapertorlugit naatsorsuutigineqarpoq seeqqusalersinniarlutik utaqqisut ukiumut 30-nik amerlisassasut.

Siffialuuteqarneq peqqutigalugu siffiaasalertinniartut maannakkut ukiut marluk pingasullu akornanni utaqqisarput. November 2008-mi utaqqisut 44-put. Ukiuni tullittuni tallimani siffiaasalersinniarlutik utaqqisut annikitsumik amerleriarnissaat ilimagineqarpoq.

Seeqqumikkut siffissamikkullu suliaritinniarlutik allatsissimasut ikilisarneqassappata suliaritinniarlunilu utaqqisarneq sivikillisisarneqassappat, taakkunungaqqissaq siunertaqartumik suliarinninnissaq pingitsoorani pilersaarusiorneqartariaqarpoq, tamannali maannakkut aningaasaliissutaasimasut iluini naammassineqarsinnaangitsutut nalilerneqarpoq.

Dronning Ingridip Napparsimavissuani pilattaanermut immikkoortortaarfia maajimili 2008-mi peqqissaasunik taartaasartunut atorfigivillugulu aalajangersimasunut aningaasatigut ilungersunartumik inissisimaneq peqqutigalugu suliaminnik annikilisaalerput. Piffissami massuma pinartoqavissumik pilattariaqaleriasaartut kisimik suliaritittarput.

Qaqugu misissugassanik pilattagassanillu pilersaaruteqarnerit aallarteqqinneqarsinnaaneranut atatillugu peqqissaasut pisariaqartinneqartut pissarsiarineqarsinnaanerit, taamaasillunilu pilattaasarfimmil pilattaaviit peqqissaasunik inuttalerneqaqqis-sinnaanerannut atatillugu apeqqutaavoq, peqqissaasut pisariaqartinneqartut qaqu-gu pissarsiarineqarsinnaanerit. Taamatut pisoqarnissaa 2009-mi januaarip naalernerani ilimagineqarpoq. Tamatuma kingorna suliaritinniarluni utaqqisanermut piffissaq utaqqiffissaq qanoq sivisutigissanersoq nalileruminaatsilerpaa, tassungalu tunngatillugu aamma sulisoqarnikkut pissutsit 2009-p aallartinnerani qanoq inissisimassanersut apeqqutaasussaammat.

Taassuma saniatigut Peqqinnissaqarfiup iliuusissatut pilersaarutigaa aningaasat ikinnerit atorlugit peqqinnerulernissaq, inuit sapinngisaq tamaat qanimut suleqatiginissaat kiisalu suliaritinniarlutik allassimasuutigineqartut ikilinissaat. Tassunga atatillugu nukiit sinerissami napparsimavinniittut atorluarnissaat siunertaralugu pilattartittussat/suliaritittussat aammalu medicinerinit nakorsarneqartussat ilaasa sinerissamut nuunneqarnissaannik iliuusissatut pilersaarummik suliaqartoqarpoq. Taamaasilluni annikitsumik suliaritittussat sinerissamut nuunnerisigut utaqqisut ikilinerneqarsinnaassapput Dronning Ingridillu Napparsimavissuata pilattaasarfiani anertunerusumik pilattartittussat suliarineqarsinnaalaalissapput.

Napparsimaleratarsinnaanermut sillimasiinerit

Naalackersuisut Peqqinnissaqarfimmi neqeroorutitut atatillugu napparsimasunik immikkoortitsinissaq kissaatiginngilaat. Taamaattumik napparsimasup siusinner-sukkut sumi qanorlu nakorsartissimanera/suliaritissimanera apeqqutaatinneqarneq ajorpoq.

Assersuutigalugu Danmarkimi namminersortunit ingerlanneqartumi napparsimavimmi seeqqumigut suliaritereersimasoq, Kalaallit Nunaanni seeqqumigut suliaritissimasumit allaanerusumik tiguneqarneq ajorlunilu suliarineqarneq ajorpoq. Suliaritereernerup kingorna assersuutigalugu sungiusarnerup misissortikkiartoqqittarnerullu tungaasigut nakorsartittut/suliaritittut assigiimmik pineqartarput. Tassa imaappoq, innuttaasut namminneerlutik napparsimaleratarsinnaanermut sillimassersimasut, innuttaasunit nammineerlutik napparsimaleratarsinnaanerminnut sillimassersimasunit allaanerusumik pineqarneq ajorput, taakkualu Kalaallit Nunaanni nunanilu allani kalaallit peqqinnissaqarfiata neqeroorutaannik akuersinissaminnut pisinnaatitaaffeqarput.

Inussiarnersumik inuulluaqqusillunga

Naja Petersen
Ilaqutariinnermut Peqqissutsimullu Naalackersuisoq